

Ebbes iwwer Flerschem

Isch habb grad omm Fensder enaus unn zu dene Wolke geguggd unn habb debei gedenkt, doo kann isch noch hunnert Johr gugge unn koo oonsisch Mol sehn die Wolke su aus wie jetz, immer onnersders. In dem Aachebligg hotts Telefon geklingelt unn moin ahle Kumpel Hubert war omm Abberat: Na, lieber Hannes, wie geht's dir denn?

Gut, saach isch, isch bin joo nitt kronk, isch habb halt nor enn Knoche gebroche.

Na ja, moont de Hubert, schlimm genug, oder?

Ja, gebb isch ze Ontwort, schlimm genuch. Awwer was hosde donn, moin Freund, dassde oorufe dust?

Doo seet de Hubert: Ich wollte dich mal fragen, was der neue Bürgermeister macht.

Ei Hubert, saach isch, der Monn iss jetz grad emol e paar Daach im Omt, den wolle merr de erst emol e bissi schaffe losse, bis merr was saache dun.

Moont de Hubert: Seit der Bürgermeisterwahl haben wir ja schon einmal miteinander telefoniert. Du weißt, wie erstaunt ich vom Wahlergebnis gewesen bin.

Dess warn merr all minonner, saach isch, dess hädd joo kooner gedenkt, dass de Beiemoosder Antenbrink nor dreißisch Prozent vunn dene Stimme kriehe deet.

De Hubert frächt: Wie bist du denn mit Antenbrink ausgekommen? Er ist ja dein Stellvertreter in unserem Verein Für Flörsheim.

Isch druff: Isch bin gut meddem auskumme, mir hadde joo nix mett Politischem ze due. Awwer jetz werrn merr unsern neie Beiemoosder in de Vorstond wähle unn mett dem werrn merr aach klarkumme.

Das denke ich auch, moont de Hubert, und ich denke auch, dass der Bernd Blisch – du weißt ja, dass ich mit ihm per Du bin – seine Sache auf dem Rathaus gut macht. Jetzt wird es einen Schub fürs Kulturelle in Flörsheim geben, oder?

Isch saach: Isch denk, ja. Nor mir Flerschemer hawwe joo des Problem, dass dess Geld ferr Veroostaldunge knapp oder iwwerhaupt nitt doo iss ...

Ja, in der städtischen Kasse, hott misch de Hubert unnerbroche, aber vielleicht wird Bernd woanders Geld locker machen können. Durch seine Arbeit im Wiesbadener Museum kennt er sicher viele einflussreiche Leute und kann möglicherweise an Fördertöpfe Kultur oder Ähnliches kommen, also abwarten. Jedenfalls wünsche ich eurem neuen Bürgermeister alles Gute für seine Arbeit.

Ich gebb ze Ontwort: Dess wunsch isch emm aach unn dess konner bestimmt gut gebrauche. Awwer grad zur Kuldur: Mir hawwe noch im November enn Vordraach iwwer die Gerichtssache vunn de Flerschemer mett de Höchster Fischer, dess werrd bestimmt indressond. Weil doo werrd bewiese, dass die Flerschemer vunn Hatterschem bis Kosdem fische derrfe.

Isch habb de Hubert förmlich grinse seh wie er seet: Es gibt ja Leute, die das bezweifeln, oder?

Jetz habb isch gegrinst: Isch hoff, dass die sich jetz endlich emol iwwerzeuche losse, schließlich iss der, der den Vordraach hält, enn Anwalt, der dess genau unnersuchd hott.

Das wird spannend, denke ich, seet de Hubert noch, Hannes, machs gut, ich ruf dich wieder mal an.

Gude Hubert, saach isch hinnerher. Unn als isch enn noch nooch soine Aache frooche wollt hadder schunn uffgeleeschd.

Eiern Honnes